

**Jelajah Muhyiddin: Pikat rakyat luar bandar, bukan isu 1MDB semata**  
**Free Malaysia Today**  
**Ogos 1, 2016**  
**Aedi Asri**

**Kempen Tun Dr Mahathir Mohamad dalam PRK Sungai Besar dan Kuala Kangsar lalu gagal meraih sokongan akibat terlalu fokus kepada isu 1MDB dan perdana menteri.**

KUALA LUMPUR: Kerjasama PKR dengan bekas timbalan perdana menteri Tan Sri Muhyiddin Yassin tidak seharusnya terbatas kepada skandal 1MDB saja, kata penganalisis politik Profesor Madya Faisal Hazis.

Beliau berkata perkara paling mustahak bagi pembangkang ialah untuk meyakinkan penduduk luar bandar yang kebanyakannya Melayu yang kepentingan mereka tidak akan terganggu jika mereka mentadbir negara.

“Bagus apabila pembangkang menyedari mereka memerlukan undi luar bandar bagi menewaskan BN. Dan untuk menarik sokongan golongan ini, mereka perlu melangkaui isu 1MDB.

“Ada lagi isu nasional yang lebih mendasar seperti jurang bandar dengan luar bandar, pembangunan dan GST tentunya. Jangan terpisah dengan isu di akar umbi,” katanya kepada FMT.

Beliau berkata demikian ketika diminta mengulas pengumuman PKR dan Muhyiddin minggu lalu untuk bersama-sama menjelajah seluruh negara bagi menerangkan skandal 1MDB kepada orang ramai, termasuk di kawasan luar bandar.

Muhyiddin dipetik sebagai berkata jelajah itu bermatlamat menerangkan isu 1MDB “dalam bahasa mudah” kerana masih ramai yang tidak faham kesannya kepada negara.

Faisal yang juga pensyarah Universiti Kebangsaan Malaysia berkata kegagalan kempen Tun Dr Mahathir Mohamad dalam PRK Sungai Besar dan Kuala Kangsar lalu akibat terlalu fokus kepada isu 1MDB dan Perdana Menteri Datuk Seri Najib Razak.

“Isu naungan (patronage) sebab utama kenapa mereka masih menyokong BN. Jadi pembangkang perlu beri jaminan kepada mereka kenapa tidak perlu menyokong kerajaan lagi,” katanya.

Sementara itu, pensyarah Universiti Utara Malaysia Profesor Madya Dr Mohd Azizuddin Sani berkata penyertaan Muhyiddin akan memberikan faedah kepada pembangkang terutama dalam mendapat sokongan Melayu.

“Melalui ceramah pula, pemimpin yang dekat dengan golongan Melayu ini turun padang dan bertemu sendiri dengan mereka. Ia tentunya lebih berkesan berbanding dengan mengeluarkan kenyataan semata-mata,” katanya.

Bagaimanapun katanya, apa yang menjadi penghalang utama ialah apabila Muhyiddin dilihat masih tidak menunjukkan pendirian jelas tentang hubungannya dengan pembangkang dan penentangannya terhadap BN.

“Namun ia akan dapat diatasi jika penubuhan parti baharu nanti terlaksana, dan mereka membentuk kerjasama dengan parti pembangkang. Ketika itu, rakyat akan semakin jelas dan senang untuk memberikan sokongan,” katanya.

**Copyright (C) 2009-2016 MToday News Sdn. Bhd. All Rights Reserved.**

Source: <http://www.freemalaysiatoday.com/category/bahasa/2016/08/01/jelajah-muhyiddin-pikat-rakyat-luar-bandar-bukan-isu-1mdb-semata/>